

VIDEO: Građani Sarajeva suzama ispratili 613 tabuta

09/07/2011 19:54 by Administrator

Tužna kolona vozila s tabutima 613 žrtava srebreničkog genocida, ekshumiranih iz masovnih grobnica nakon najvećeg genocida na tlu Evrope počinjenog nakon Drugog svjetskog rata, prošla je danas kroz Sarajevo nakon početne destinacije, Visokog.

Na putu iz Visokog prema glavnom gradu Bosne i Hercegovine zastala je u Vogošći, a potom u Sarajevu na glavnoj gradskoj saobraćajnici ispred zgrade Predsjedništva BiH i ispred pijace Markale, velikog ratnog stratišta Sarajlija.

S tog mjesta je desetak minuta poslije 12 sati krenula put Potočara, gdje će 11. jula, na dan srebreničkog genocida, biti klanjana kolektivna dužina za 613 žrtava, muškaraca i jedne djevojke koja se u srebreničkom paklu jula 1995. nije mogla odvojiti od svojih bližnjih.

Žrtve su s dostojanstvenom tugom ispred zgrade Predsjedništva BiH ispratili članovi rodbine, članice iz udruženja Majke Srebrenice i žene, predstavnici bosanskohercegovačke vlasti i međunarodne zajednice, građani Sarajeva i drugih mjesta iz zemlje i inozemstva.

Nijemo ili učenjem Fatihe izrazili su pijetet žrtvama, a neki od rodbine i drugih poštovalaca dodirivali su rukama kamione s tabutima.

[VIDEO:](#)

Cijelom dužinom puta kojim je kolona prošla kroz glavni grad prolaznici su zastali, mnogo njih s podignutim rukama uočavaju fatihu i sa suzama na licima i muškaraca i žena. Stavljali su cvijeće na kamione s tabutima ili ga bacali putanjom kojom su tabuti prošli.

Za to vrijeme gradski saobraćaj je bio zaustavljen.

Brojnim novinarima izjavu je ispred zgrade Predsjedništva dao član te državne institucije Bakir Izetbegović, vidno potresen.

"Ovo je mrlja na savjesti međunarodne zajednice i crna rupa na savjesti onih koji su počinili zločin", rekao je.

"Ono što mi možemo učiniti je da se uporno i strpljivo borimo za očuvanje jedinstvene Bosne i Hercegovine i gradimo prosperitetnu zemlju koja teži Evropi, u kojoj će se svi ljudi osjećati dobro, a zločinci loše", naveo je Izetbegović.

"Ako je strpljiva izgradnja prosperitetne države osveta, evo ja pozivam na takvu osvetu", dodao je.

S Izetbegovićem u društvu, poštovanje žrtavama izrazili su i američki ambasador u BiH Patrick Moon te američka senatorica Jeanne Shaheen.

Ona je novinarima rekla da to čini u ime građana Sjedinjenih Američkih Država.

Izvor vijesti: Sarajevo-x